



UNIVERSITÄTS-
BIBLIOTHEK
PADERBORN

**Pauli Laymanni e Societate Iesu Jus Canonicum
Commentario Perpetuo Explicatum**

Et Uberi Non Minus Ac Varia Qvam Clara Et Solida Doctrina Illustratum

Commentarius In Librum III. Decretalium

Laymann, Paul

Dilingae, 1698

Capitulum XXXVII. Si Episcopus.

[urn:nbn:de:hbz:466:1-62482](https://nbn-resolving.org/urn:nbn:de:hbz:466:1-62482)

esse inter gratiam factam, & faciendam; gratia facta alicui, puta si Papa Romæ alicui Canoniatum contulerit, constituto executore, & postea statim moriatur, non extinguitur, sed manet, consequenter etiam executio, tanquam gratiæ accessoria, fieri potest. At verò gratia alicui faciendâ ab ipso mandatario, seu executore, exspirat concedentis morte, si res integra sit, seu nondum cœpta executioni mandari, puta si Papa iusserit Episcopo, ut Canoniatum, si vacet, vel proximè vacârît, conferat Titio, qui est casus hujus Capituli.

CAPITULUM XXXVII.

Si Episcopus.

PARAPHRASIS.

Dubitatum fuit, si Episcopus v. g. Augustanus alteri Episcopo licentiam concessit in eadem Augustana diœcesi ordinandi, isque Sacrum Ordinem contulit Clerico non habenti sustentationis titulum, uter Episcopus ei necessaria providere debeat, donec beneficium consecutus fuerit, ordinansne, an is, qui ordinationis licentiam concessit. Respondet Bonifacius VIII. si Episcopus proprius alteri Episcopo ordinandi licentiam indeterminatè commisit, ipsemet ordinans providere debet, cum in culpa fuerit, sine titulo aliquem ordinando; sin verò certas personas commisit, qui sustentationis titulo carebant, Episcopus, qui commisit, providere eis debet, donec beneficium ipsis contulerit; quòd si verò Episcopus Clerico suo dimissorias concesserit, ut à quocunque voluerit, Episcopo Ordines accipere possit, is, qui talem licentiam tribuit, vitæ necessaria providere debet, propterea, quòd talem licentiam eum dare non oportebat ijs, qui sustentationis titulum non habent.

SUMMARIUM.

1. Licentia alteri indeterminatè concessa, ut Ordines in diœcesi non sua con-

ferat, intelligi debet, sicuti Sacri Canonis exigunt.

2. Qui literas dimissorias generales alteri dat, titulum sustentationis non habent, ipse tali providere debet, nisi solita clausula sibi caverit.

Notandum primò. Si Episcopus subfraganeo suo indeterminatè, & generalitèr committat, ut ordinationem faciat, intelligi debet, sicuti Sacri Canonis requirunt, ideòque ut ordinandi habeant titulum sustentationis, quare si Clericum titulo carentem in sacris ordinaverit, ipsemet ei providere cogitur. Consentunt, quæ dixi in c. Episcopus 4. hoc tit.

Notandum secundò. Si Episcopus subdito suo sustentationis titulum non habenti literas dimissorias generales det, ipsemet ei providere debet; verumtamen cautelam dimissorijs apponi solitam refert hic Gl. *modo vobis constiterit de titulo sustentationis sufficiente, in quo consentiam vestram oneramus.* Sin autem talis clausula non sit apposta dimissorijs, præsertim si speciales sint, seu ad certum tempus delimitata, tunc is sollicitus esse non debet de titulo sustentationis, sicuti dixi in cit. c. 4.

CAPITULUM XXXVIII.

Quamvis.

PARAPHRASIS.

Pontifex cuidam Episcopo facultatem concessit sex beneficia, autoritate Apostolica, conferendi, si vacaverint per obitum, vel renunciationem; postea verò cum unum ex his beneficijs vacaret, Papa scripsit cuidam alteri executori, ut certæ personæ conferret. In hoc casu Episcopus collationem facere non potest, propterea quòd gratiæ generali derogatur per gratiam specialem, licet in eam mentio non fiat gratiæ generalis. Similiter si Pontifex alicui Episcopo concesserit facultatem conferendi beneficia diœcesis suæ, quorum collatio ad Sedem Apo-